

AKASHVANI AIZAWL

REGIONAL NEWS UNIT

TRANSPORTATION OF DECEASED PERSON

Mizoram sorkarin khualkhuuaa thite ruang phurh man a tumsakna, 'Assistance for Transportation of Bodies of Deceased Persons within Mizoram' kaltlangin ruang 1,266 phurhna man cheng nuai 137.86 pek a ni tawh.

Ruang phurh man buaipuitu Social Welfare department hotute chuan Akashvani zawhna chhangin, ruang phurhna senso sorkarin a tumsakna hi December 2024 atanga a taka kalpui tan a ni a, ni tin deuhthaw dilna an dawn thu leh September 30, 2025 thleng khan ruang phurh man dilna 1,266-ah cheng nuai 137.86 an pek tawh thu an sawi.

Mizoram sorkar chuan ruang phurhna senso atan kum 2024-25 leh 2025-26 atan budget-ah cheng nuai 500 ve ve a dah a; ruang phurh inkaihhruaina in a tarlan danin, ruang phurh tur chu a thlenna tur km. 20 aia hnai a ni tur a ni lo a, km. 20 piah lamah chuan tu tan pawh hman theih niin, lirthei thlen theih chin a huam a ni.

Inkaihhruaina ang chuan, ruang phurhna lirthei hman man chu State Transport Authority in rate a siam anga kalpui a ni a; ruang phurhna man sorkarin a peksak hian lirthei pakhat chiah a huam a, lirthei hman (hire) theihah hian cheng nuai 17 man chin chunglam lirthei a huam lo.

Ruang phurhna hlat zawng chhût nan ruang chhuahna atanga a dahna hmun inkar hlat zawng lak tur a ni a; lirthei thlen lohna khua a nih chuan lirthei thlen theih tàwpna thleng a ni. Ruang phurhna chu kawng tawi thei ber hman tur a ni bawk.



RASHTRIYA POSHAN MAAH 2025

Nu leh naupangin chaw tha an dawn theih nana inzirtirna Rashtriya Poshan Maah pualin Dawrpui Multipurpose Hall ah zirlai naupang hrang hrang hnenah zirtirna hun hman a ni.

Wawiina hun hmanah hian Health Dept Director leg AYUSH Director Pi Lalthlengliana chuan khuallian niin a hmanpui a, School sawmbik atangin zirlai 700 chuang leh zirtirtute lo kalin , he hun hi hlawk taka hman a ni.

Khuallian, Dr Lalthlengliani chuan taksa thau lutuk chu tun hma lam chuan mi hausa zawkte natna anga ngaih thin a ni a, mahse tunah chuan mi nawlpuiah a

tam hle tih sawiin Thau lutuk chuan natna hrang hrang zingah zunthlum, BP sang, lung natna, stroke leh cancer chi hrang hrang a thlen theih avangin hriselna ti derthawngtu lian tak a ni a ti a, hetih lai hian awlsam taka inven theih ani tih sawiin ei leh in chu an duhthlanna a ni a, chuvangin duhthlanna dik leh hrisel an neih a ngaih thu a sawi bawk.

Vawiina hun hmanah hian Directorate of AYUSH Programme Officer Dr.Shirley Lalbiakzuali Chhangte chuan Taksa insawizawi pawimawhna leh mahni a awlsam taka insawizawi dan a sawi a, mithiam hrang hrang ten zirtirna an pe bawk.

Rashtriya Poshan Maah (Nutrition Month) pual hian taksa hrisel mi tinin an neih theih nan theihtawpa inzirtir a ni a. Kumina thupui atan “Thau lutuk tura inven nana thlum, al, leh hriak ei tlem’tih hman a ni a. Tunlaia hriselna lama kan buaipui lian ber zinga mi, natna inkaichhawn chi ni lo lama beihpui thlakna lam a hril a. Kuminah hian September ni 15 atanga October ni 16 thleng hi sorkar laipui chuan Nutrition Month atan a puang a, taksa hriselna vawnhim kawnga mitin hmalak theih nan Sawrkar chuan hma a la a ni.



HEALTH MINISTER

Health Minister Pi Lalrinpuii chuan nimin khan New Delhi ah Union Health Minister JP Nadda hmu in Mizoram mamawh hrang hrang a thlen.

Health Minister hian Mizoram chu ziaak leh chhiar thiam tamna ber state leh state ralmuang ber ni mahse Central Sawrkar zirna in lian - IIT leh IIM an neih ve loh thu sawiin India ram State hrang hranga doctor zirna in tha leh damdawi in lian awmna AIIMS chu Mizorama din ve ngei turin a ngen a, Sawrkar laipuiin kum 2006 atangin India ram hmun 22 ah AIIMS thar din turin hma a la tawh a, tun dinhmunah heng AIIMS 22-te hi hlawhtling taka kalpui tawh annih avangin AIIMS thar dinna scheme - Pradhan Mantri Swasthya Suraksha Yojana chu tuaithar a, Mizorama AIIMS din ve ngei turin Union Health Minister chu a ngen a ni.

Union Minister JP Nadda chuan Mizoram Health Minister dilna thlen chu an lo zirchian tur thu leh AIIMS hawn a nih ngei theihna atan hma a lo lak tur thu a sawi a. Mizoram Governor, General Dr. Vijay Kumar Singh-te nen pawh inthiantha tak an nih thu sawiin, a theih dan dana hmasawhna kawnga thawhho a duh thu a sawi a ni.

Nimin vek khan Pi Lalrinpuii chuan chuan Union Minister for Women & Child Development Department Annpurna Devi, chu a pisa ah hmuin Women & Child Department hmalakna tur hrang hrangte an sawi dun bakah Women Helpline sum release tlai chungchang pawh lo enzui a tum thu a sawi bawk.



MANIPAL HOSPITAL PRESS CONFERENCE

Manipal Hospital, EM Bypass chuan Breast Cancer Awareness Month pualin vawiin khan Aizawl Press Club ah thuthar thehdarhtute an kawm a, Mizoram atanga hnute cancer tam tak an enkawl dam tawh tih sawiin cancer zingah hnute cancer chu a hluar hle tih an sawi.

Manipal Hospital, EM Bypass hian vawiin khan Aizawl Press Club ah thuthar thehdarhtute kawmin ramchhunga hmeichhe cancer zingah hnute cancer chu a hluar thu an sawi a, Mizoramah pawh cancer natna tam ber anih thu sawiin mithiamte chhut danin kum 2030 ah cancer chu kum tin mi nuai hnih vel hri kai thar hmuhchhuah an awm tura chhut ani an ti a, hemi kawngah hian mi tin te inven theih ani tih sawiin mipui hrilhhriat chu a pawimawh takzet tih an sawi.

Dr. Pooja Agarwal chuan hmeichhe hnute cancer vei an hmuhchhuah chu enkawl hma annih chuan dam taka enkawl theih anni a ti a, a hun taka enkawl annih theih nan mi tin te inven bakah mahni dinhmun hriatchian a pawimawh an ti a, hnute cancer vei ten an mimal nun thlenga a nghawng nasat zia leh hriatthiam an tulzia sawiin invenna tur leh a hun taka enkawlna chungchangah midang hrilhhriat a tul thu a tarlang bawk.

Manipal Hospital, EM Bypass hian Breast Cancer Champion's Meet buatsaihin damlo an enkawl Juliet Lalruatmawii Ralte, kum 28 mi leh Lalruatfeli kum 33 bakah Zonunmawii kum 31 te chuan enkawl annih dan sawiin hmun hrang hrang an pan hnua an beidawn hnuah Manipal Hospital kalin an beisei aia tha enkawlna an dawn thu an sawi a, taksa damna mai piah lamah an enkawlna tha tak chuan rilru hahdamna a pe an ti a, enkawlna tha an dawn avanga damchhuak annih thu an sawi a ni.

